

西事江略

一
八
冊
函

西事彙略卷伍

迤西陸防各軍總司令部編輯

軍政

陸軍

爲札委事案奉軍都督府命令第二師出發所有軍中餉械等項亟應設立兵站以爲後方策源查楚雄地方適中應即將第二師兵站設於該府城內委任兵站長一員以專責成查有楚雄府黃彝堪以兼充第二師兵站長除呈報軍都督府外合行札委札到該守卽便遵照所有楚雄兵站事宜仰卽督率駐紮軍隊妥爲經理保衛勿稍疎忽切切特札右札委兵站長署楚雄府知府黃彝

命令軍人有嚴格之紀律亦有最上之人格從前軍中處罰有責打軍棍一種實沿綠防弊習亟應首與禁革茲與我各官長約自今伊始各隊目兵除重大過犯另予懲罰外其有犯小過者准其責打手掌禁用軍棍蓋以養其廉恥而尊重軍人資格也仰各部隊長官一體遵照此令

軍都督府鈞鑒本日有陸軍小學生十七人到榆來見據稱係奉委西防國民軍教習查委派各生源處並未奉有文電西防國民軍騰永已允七營此外營數無多窮於位置騰軍疑懼未泯尤慮不能相安故此次帶來人員皆未敢據行委派且機關部裁撤各員多懷缺望彼見新生先邀委用恒情必不能平又軍中階級宜嚴上輕予則下躁進講武堂特內兩班學生到榆多除其階級今小學各生均服小隊長服裝頗滋物議源忝受斯任事關軍政職在盡言以後委任各項軍職應請先行飭知庶協軍制而免窒碍師長根源叩元印

查講武堂學生段振基初入堂時即冒稱老窩土舍經本師長查悉該生實係老窩土舍疎遠族屬乃敢來堂冒充恐其入堂倚勢生端當即斥去不予收學嗣經雲紳王九齡等來堂力爲懇求復由該生出具永遠不敢爭鬭違甘正法切結現在隨師到榆因念該生入堂以來尙稱勤謹或已改前非此次籌辦邊務不能不資一二熟習邊情夷情之人始委該生充當邊務委員姑以觀其心地才具是否可用乃該生甫經奉委初

念復萌託人要求代辦老窩土舍其覬覦土職之心固已自行發露查老窩故土職身後本有親生之子承襲自有所歸且有印婦護印何須疎族代辦致啟爭端該生前既冒充土舍茲復希冀代辦意圖爭襲昭然若揭如果令其回籍必肇攘奪之禍邊事何堪設想防微杜漸斷難稍事姑容致貽邊患應卽革除軍籍凡陸軍巡防一切軍隊概不准其投効并發交大理府暫行監禁以戢野心而遏亂萌除通飭外爲此命令該隊一體知照此令

大理孫聯長永昌王大隊長鑒第七聯第二中隊第三小隊長張琪在騰擅入民家估奸搯詐經人控告來轅時值徐教練官率隊出發當將該小隊長張琪先行拘留聽候查辦查軍人所最重者名譽所最嚴者紀律倘有此種行爲實屬敗名犯紀爲軍隊所不容該各隊長務宜訓誡所部嚴加約束無稍懈弛是爲至要總司令部青印

省城軍都督府鈞鑒頃據排長段文海稟稱自備學費懇請送赴日本肄業陸軍學校以資造就等情前來查段文海籍隸騰衝年二十一歲係講武學堂丙班畢業生資質

明敏體力強健前在學堂盡心向學反正之際均在事出力頗著勞勩茲復能自備資斧留學東瀛志趣遠大誠所罕覩現在民國新建建設需人慎處邊隅人才尤乏與其藉資於臨時何如培養於平日該生不甘小就遠期深造似未便阻其向學之誠擬請鈞府併同源弟根澤電准南京陸軍部將該生等俱送日本學習陸軍年需學費若干飭其按數預繳可否伏乞電示祇遵師長根源叩冬叩

省城軍都督府鈞鑒機關槍隊副目班龍珠藉端搞搯私結盟會實屬違犯軍律據該隊中隊長邢春芳呈請懲辦前來當於本日訊明即按律正法訖謹陳請飭備案師長根源叩虞叩

爲命令事訪聞城保各練徵集之兵內有由該地方勒派應募并允許攤款暗給津貼者似此辦法是視當兵之義務爲牟利之地徵兵精意自此壞矣爲此仰該大隊長即便遵照集合全隊剴切宣布凡受有地方攤派私款津貼者均令自行陳明不准收受津貼并由該大隊長一面咨明騰衝府並騰衝自治公所轉飭取銷具報查考自經此

次宣布之後如該兵等陽奉陰違仍暗地收受地方攤派津貼一經舉發定按軍法懲辦決不姑貸切切此令右令騰衝獨立大隊長施繼伯

騰越黃守鑒蒸電悉榆局專兵張本祥夾帶私貨已犯稅章稅局查詰本屬正辦該專兵竟敢拔刀砍傷司事左手實屬兇橫已極現在兵丁多蹈驕恣之習若不從嚴懲辦流弊伊於胡底應即將該兵張本祥開去軍籍由該府先行收禁照私帶貨物持刀逞兇例加一等議擬治罪並出示通諭以昭儆戒所帶乳扇兩駄卽行充公通報查考再馬福元本係商會職紳前因綜覈稅欸特由商會舉往承辦非尋常司事可比並由該府傳諭慰問加意醫調仍屬照常任事爲盼總司令部灰印

省城軍都督府鈞鑒佳電奉悉第八聯第二中隊第一小隊長楊炳堯前經在騰訪聞素不安分於舊歷正月內在榆演戲聚賭挾優爭風持械滋事幸經壓息未至釀禍各情適前充該中隊長施繼伯到騰詢據稟稱榆軍退伍之際該小隊長復造謠煽惑並屢次勾結目兵圖謀不軌等語當將該小隊長先行調騰以免滋亂並電榆飭查具覆

續據孫聯長繆中軍官電稱該小隊長前此在榆始則磕詐居民當經民人具控到縣有案其後乘目兵退伍之時散布種種謠言煽動軍心意在約同該中隊目兵燒搶榆城幸該目兵深得施繼伯平日教育尙明大義不允同謀後復勾結第七聯第一大隊目兵作爲接應該目兵亦不允從並即報告鍾大隊長旋據該大隊長及陸炮隊長報告前來當經審飭令鍾陸丁三隊長嚴加防範並密囑該隊司務長郭汝才留心監視如有不法動作即行將其槍斃免害地方該小隊長此等謀爲不法幸早暴露防範嚴密得無他虞請俟該小隊長到後卽予懲辦以杜後患等情經卽具電請示辦理該小隊長隨於佳日到永當卽傳案將查覆各節詳加質訊該小隊長俯首無辭遵照鈞電立予正法茲集合駐永各隊宣布罪狀各官長目兵僉稱可殺謹電陳請鑒核飭部備案並予宣布周知師長根源叩灰印

省城軍都督府鈞鑒月密據第七聯繆代聯長呈稱據第一大隊長徐進報稱該大隊第二中隊小隊長陳香亭本月初五日具稟請假回籍尙未轉奉批准該小隊長竟潛

向司務長支取本月薪餉私逃當卽派小隊長張增福率兵十名星夜追緝初六日在趙州拿獲解榆送交大理府管押稟請從嚴懲辦以肅軍紀等情查陳香亭身爲軍官拐餉私逃實屬大干軍律且軍官私逃尤爲聞所未聞其中顯有別情不能不切實查辦旋查得陳香亭本哥老會巨魁反正之初原充該大隊副兵郭教練官由永昌率隊回榆行抵觀音堂該小隊長受蔣管帶指使僞傳曲統領命令手將郭教練槍斃及曲統領查覺將蔣管帶正法該小隊長又在營鼓動黨羽謀戕曲統領以圖不軌事爲郝小隊長景桂所知郝景桂深明大義性復激烈聞卽以槍先擊陳香亭未中陳黨環攻郝景桂寡衆不敵郝急反奔陳率黨追至西城外追及卽將郝景桂槍斃當陳郝互鬥時槍聲隆隆營內大譁曲統領始亟出走陳香亭復敢率黨追殺不及而返後陳香亭等意僞報郝景桂誤放槍聲將曲統領驚走追挽不回恐負重罪自行戕斃事爲榆城所共知陳香亭自此勢力更大因得公舉爲小隊長似此窮兇極惡言之髮指榆聯秩序破壞幾危大局該小隊長實爲罪魁此次畏罪情虛復敢拐餉逃逸種種不法死有

餘辜若不明正典刑實無以昭儆戒而申軍律小隊長郝景桂因公殞命死尙蒙誣尤堪矜惻自應亟予湔雪以慰忠魂應如何加恩議卹統候衡核示遵根源叩

大理李師長鑒月密刪電悉陳香亭爲哥老會巨匪既戕郭教練復敢鼓煽黨類謀爲不軌現又拐餉潛逃實屬不法已極亟應正法俾昭儆戒郝景桂捐軀就義深堪憫念候飭登庸局議卹以雪冤誣而矜毅烈都督府篠印

省城軍都督府鈞鑒前准撤差之第八聯第二大隊第三中隊長鄭別已於九日發交大理府署監禁並電飭永平李令治飭將該中隊長在永捕截情形查明稟辦俟稟復到時再爲研訊擬辦謹電陳明師長根源叩寒印

省城軍都督府鈞鑒月密已撤中隊長鄭別盤查散勇隱匿搜獲贓物前經電奉飭確查懲治當於到榆後將該中隊長發府拘禁電飭永平李令澈查據復電稱鄭別截獲張祠樑唐明臣等貢金聞已携去尙有沙金交縣屬范靜齋代製手鐲追繳到縣重八兩一錢七分其經該員囑託買換金子者共有十數人又該員騎騾乃正法何匪之物

約值八十金該員以劣馬換繳其在滄江獲贓甚鉅隱匿尤多署縣目睹者已在數事又逼永紳登報頌揚以掩其惡以上各節均屬實情倘有虛偽甘與同罪等語復經派員會同秦守到該中隊長寓內詳細檢查有皮箱二口多係舊式普通服及麝香等件又於該中隊長身旁查出金戒指六道既非軍人所帶之物尤非行軍時所帶之物其所從來不問可知嗣又搜獲永平范靜齋劉光正與該中隊長信函內均係代打金鐲戒指等事所開金鐲重量與李令電稟數目相符又有何濟舟帶交玉手鐲一對洋銀二十八元信函一件經將戒指玉手鐲銀元各物發府存案外尙有范松年卽范靜齋劉光正及劉有清由永平與該中隊長通信所言均係代爲秘密探聽設法解脫等事除范靜齋已由永平縣管押外其餘劉光正等亦經密飭李令查拿訊究去後查該中隊長平日開山設堂結盟拜會種種不法前電陳明在案此次貪贓違法証據鑿確實屬有玷軍職應如何懲辦之處伏乞迅賜核示遵行根源叩

豔印

大理李師長鑒月密豔電悉鄭別身爲軍官竟敢開堂結會並私匿鉅贓實屬貪婪不

法應綁赴市曹處斬宣示罪狀以昭炯戒餘如來電辦理都督府卅一

省城軍都督府鈞鑒月密鄭別案自前電發後卽據在榆第七聯軍官佐及講武堂學生等稟稱該隊長在永衛戍地方盤查奸宄不爲得力故叛兵未能下竄地方不致糜爛伏乞以功贖罪等情源嚴詞拒之該軍官佐學生等環爲懇求聲稱兵以衛民如民間得所保護雖蒙重戾尙可曲原再三求派密查貸其一死爲請源以派人查辦更得真相藉服衆心乃因委員劉濬赴雲龍查案之便順飭往永偵察去後旋奉全電當以密查未覆故暫緩宣佈昨據回稱該鄭別帶兵戍截瀾滄江曲峒等處逢人盤詰商旅恨之然奸匪未敢橫行地方賴以無事所匿巨贓皆係匪物并非剝奪商民等語竊思鄭別拜會婪贓本有應得之罪茲該軍官佐學生等援同袍之義念同學之情合詞乞恩詞意懇切現據委員查覆羣以功可贖罪日復苦苦哀求源於鄭別亦屬師生因迫於公義難徇私情未敢代爲陳請謹爲據情轉電可否免予正法量從末減定以永遠監禁之處伏候鈞示祇遵師長根源叩眞印

大理李師長鑒月密真電悉鄭別案他罪尙可寬宥惟反正之夜槍斃文鴻達軍界中人尙有目擊其事者至今憤恨斷難姑寬應仍照前電立予正法都督府元印

省城軍都督府鈞鑒奉電飭將鄭別即行處斬等因查該鄭別固罪有應得惟中間諸多碍難應請格外恩施免其身首異處飭大理府秦守會同提標中軍楊參將將該犯即在獄中秘密絞決再前起獲該犯所匿之金器贓物皆係搜掠騰永散勇而得現既未便發回騰永而大理公款支絀擬請即發交大理府充爲地方公用是否可行伏候示遵師長根源叩江印

大理李師長鑒江電悉該犯鄭別從寬絞決所匿金銀贓物希即如電辦理都督府微印

令本師長於歌日電陳軍府文曰據代理第七聯長繆嘉壽轉據第一大隊長徐進呈稱大隊長前在北洋陸軍大學堂肄業時值反正回滇蒙派衛戍司令部二等參謀委赴西防偵查行抵永昌後奉改委今差現陸軍大學仍舊設立行文各省招集從前修

業學員入堂經衛戍羅司令電示到隊大隊長距畢業年限尙欠一學期學科未完服務難期盡職懇准申送北洋畢業等情查該大隊長到差以來恪盡責任茲以軍官學校尙未畢業請予申送入校志趣可嘉擬俟該大隊編配完竣准給假九個月赴京肄業畢業後仍回原差該大隊長差使暫委該大隊副長丁恩遠代理可否之處伏候核示飭遵旋奉軍府復電開江電悉徐進准給假赴京肄業遺差即着丁恩遠代理候飭部備案等因奉此除分令外合行錄電令知爲此令仰該聯長即便遵照分別飭知並飭該大隊長假滿即行回營供差勿得逾延是爲至要凡假期以內該大隊長月薪着以十分之七發給該大隊長以十分之三津貼丁大隊副長公費照章辦理均以交替之日起算並將該員等交替日期通報查考此令右令步兵第七聯長繆嘉壽

國民軍

軍都督府鈞鑒迺電有奉臨時總統舉定中山民國幸甚當卽布告各軍民以慶祝新年之日爲慶祝孫大總統舉定之期並懸新定國旗以彰盛典惟源所用關防有西防

國民軍總統官字樣似於體制相淆擬請鈞府酌核改定並乞另頒關防以定一尊而免淆誤師長根源謹叩有印

省城軍都督府鈞鑒西防國民軍第一營右半哨兵四十名快槍四十桿先後在永昌漾潭爲陳雲龍裹脅繳械經李提督銑電陳明請示募補奉飭就源商辦查榆城現有陸軍駐紮此項國民軍四十名無妨暫闕永昌當兵燹後守土者若無一兵實不足以資調遣擬請即將第一營右半哨四十名兵額令由守雲龍募爲衛兵餉照國民軍核發可否乞示復以便分別令行遵照師長根源謹叩銑印

李師長鑒刪銑兩電均悉李統領請添募土兵一節尊意飭將中哨弁兵撥半哨分紮喇井等處不必增兵兩能兼顧所論極是昨據電同前由當以餉絀未准麗城需兵防範由所轄各防營內酌撥駐紮電飭在案至西防國民軍第一營右半哨兵四十名既於榆城無關損益永昌無兵自可令由守雲龍帶往作爲衛兵餉項照發希轉飭遵照軍都督府巧印

軍都督府鈞鑒陸軍餉章兼差不兼薪巡防各隊似應一律辦理現如大理提督暨騰越鶴麗兩鎮均兼充統領順雲維西兩協暨麗維李統領大理提督並兼管帶應否飭令僅支各本缺俸薪其統領管帶兼差薪水概從裁撤以昭劃一而節軍帑祈通飭遵辦當此庫欸奇絀南防普防江防暨鐵路上下段可否一律照此辦理並祈核奪師長根源叩箇印

麗江李統領鑒敬電悉賀管僅交關防不辦交代殊屬不合惟槍械兵丁若無遺失短少姑免深究否仍從速緝拿查究懲辦張錫光缺額蝕餉酗酒毆法各情詢據姚守稱亦相同并稱該哨官潛蓄異志前次幾覆麗城尤爲法所不容希卽嚴密拏案令將兵餉結算清楚立予就地正法具報查考已電軍都督府矣根源有印

陸防總司令鈞鑒本管賀龍光於敬日酉時已追回麗當即嚴飭造冊清白交代惟是日據馬管面稟管帶點驗兵丁并詢及九月分餉銀該左哨官張錫光不受盤詰肆行毀罵指揮兵丁當堂舉動幸該哨之兵多係土著雖令不從僅有一兵謝玉全手持軍

械直撲兇毆適差弁招支隨行網紮今與張錫光一併送呈究辦等情當將該等飭交麗縣管押似此不法軍紀安在應請從重治罪以警效尤統領李德泳謹稟有印

陸防總司令鈞鑒有日戌刻據管帶馬遇春驗文呈報敬日點兵查得左哨官張錫光哨內正兵缺額九名當以管帶由喬后帶麗餘丁頂補又缺額正兵五名臨時該哨官以火夫提補其火夫僅有三名查前後共缺額十四名懇請轉報委員加查九月分餉全營未發等情據此當此時際艱難該哨官不能激忠報稱猶敢缺額至十四名之多實爲駭聽合肅電稟祈示遵辦原文另呈統領李德泳謹稟有印

爲呈報咨明事竊惟照順甯麗江永昌大理等處大勢雖已粗平人心尙覺未靖非留軍隊駐紮不足以資鎮懾惟既駐有軍隊而各該地方官吏不兼軍銜地方有事匪特兩相隔閔呼應不靈更恐各分畛域貽誤事機前順甯府張守漢臯到任曾經呈明委兼第二師諮謀官在案現奉電飭將總統名稱更正爲總司令官自應將順甯張守所兼第二師諮謀官改爲迤西陸防總司令部諮謀官大理府秦守已兼充本司令部參

事即可不另兼銜所有麗江姚守永昌由守均請委充迤西陸防總司令部諮謀官不另支薪以期與軍隊情懷互通易於接洽其麗江府原日兼有副營務處名稱應卽飭令取銷除分別札委外

理合具文呈請查核備案爲此具

相應

呈

須至

咨

者右呈都督府右咨參

謀部軍務部軍政部

麗江李統領鑒頃接姜兼帶德興全電稱准小維西教士彭茂德函稱保教巡弁蔣滿堂多病請更換遺缺保軍功羅燦章充補等情副將未敢擅專祈核示等語查用人行政在我自有權衡該巡弁如果多病曠職應由該兼帶查明自行稟請撤換何至使教士借口出頭干涉並輒據教士之言率爾轉稟實屬不明事體不知權限希即嚴加申斥嗣後該兼帶所有請示事件並應先稟由執事核轉至該處巡弁有兼保教堂之責蔣滿堂既屬病軀自難勝任應即撤差遺缺由尊處揀弁接充飭將該處教堂妥爲保護并飭姜兼帶遵照根源叩江印

省城軍都督府鈞鑒南甸盡達蠻允地方原係國民軍第十一第十二兩營衛戍地點